

四庫全書

集部

欽定四庫全書

集部

文忠集卷一百七十八至

詳校官庶吉士_臣李傳熊

主事_臣呂雲棟覆勘

總校官進士_臣楊懋珩

校對官學正_臣李 巖

謄錄監生_臣李如梓

欽定四庫全書

文忠集卷一百七十四

淳熙玉堂雜記上

宋 周必大 撰

錢文僖公惟演金坡遺事舊云規學士六人遇聖節共率百二十緡寺中設齋今送五十千與樞密使同開道場前一日赴宴當時所記如此近歲樞密滿散聖節及貴院賜宴則學士待制皆與而無送錢故事又六參隨樞密班先入止是再拜不舞蹈并遇宣麻不

往皆內朝故事也

金坡遺事又云聖節唐時惟六學士及二使

謂中官樞密使赴

待詔雖發書

闕

亦不與坐又云本朝淳化五年十月

上賦詩一首令待詔吳郢張用和齋以示學士張洎

錢若水又李昌武宗諤翰苑雜記學士初授中謝前

一日待詔一名至私第宣召入院聽口宣舞蹈訖揖

待詔上階相見具酒果迎待即以事例物并書致於

待詔前熙寧間司馬文正公日記云初除學士待詔李

堯卿宣召設香案褥位於庭望闕堯卿稱有勅光再拜堯卿口宣云云光每句應喏畢再拜舞蹈又再拜升階與待詔坐啜茶蓋中朝舊典也今學士院有待詔四人或右選或白身子為學士忠誨郎錢滋來宣召大畧如李馬二公所記而無對揖茶酒之禮例支十千辭云自來虛喝不敢受予強予之常曰學士入院坐堂上朱衣吏初贊喝東院錄事某人以下躬喏訖又喝云各祇候次贊喝西院某人以下亦如之最

後平贊云待詔既不名亦不喝各祇候則待詔與院吏固亦有間若平居則視之全與吏等無由待以茶酒豈將命時不欲吏之耶抑祖宗時所遣或翰林他局之待詔耶然唐制發書闕赴聖節禮已厚矣

李仁甫燾

續通鑑長編開寶二年太祖命李昉盧多遜

直學士院昉前在翰林堂吏因事至者每拜堂下事已即遣未嘗與坐至是拜堂上更展叙中外無復曩日之禮昉愕然詢同列則云數年矣司馬文正公曰

記云熙寧二年五月癸巳鎖院以奉安仁宗御容禮
成德音降西京囚杖以下放是日丞相出中書提點
魏孝先以下入院授以參政趙抃所封御前札子茶
湯虛閣御藥劉有方來茶湯館于門闕復謁御厨翰
林設食致酒果黃昏進首尾詞內批依此修寫四鼓
起讀點句攢點進入明日丞相退朝宣訖開院淳熙
三年十一月八日某被宣草十二日冬祀赦黃昏方
至院御藥持御封中書門下省闕狀來繫鞵迎于中

門內侍一員俱升廳御藥先以闕狀授監門共茶湯

訖先送御藥出院復與監門升廳受闕狀付吏又點

湯送監門下階館之門塾而不報謁既熟狀自內出

非參政所封故提點官不來惟中書下省刑房錄事

尚書省刑房主事各一人穿闕同至仍舊繫鞵見之

不迎不送不設茶湯而退守當四人貼房十數人旅

揖階下與文正公所記多不同至六年九月十二日

復被宣草明堂赦御藥張安中監門梁襄相見如儀

惟錄事沈樸主事李師文茶而不湯院吏云前不設
茶誤也守當官等不復廷揖所謂酒饌之賜今皆無
之詰朝奏知先出而吏卒輩皆俟三日後宣赦訖乃
得歸

太上初遜位上尊號時陳丞相康伯當國集議定命學
士洪景嚴遵撰議文然後降詔某時任察官心知其
非而無由改乾道六年郊祀禮成加上尊號某在翰
苑始引唐故事乞上帥羣臣過宮表請既允然後降

詔國朝止有人主上母后尊號故冊文稱嗣皇帝靖

康上教王道君之號徐丞相

處仁

已命汪彥章

藻

代

作冊文會有疆事不及禮行紹興三十二年初上德

壽尊號乃承例用嗣皇帝乾道六年上既表加乞上

尊號而院吏寫表亦稱嗣皇帝私謂未安謹按唐明

皇傳位後顏真卿議肅宗不當于宗廟稱嗣皇帝况

親奉表德壽乎以白虞丞相

允文

丞相難之必令尋

例某思建炎以後遇節朔遥拜徽宗表是時翰苑多

名士必不誤用乃督吏搜舊牘明日果得表本一冊
止稱皇帝又按韓文順宗實錄載憲宗上順宗尊號
冊文亦稱皇帝臣某此最可據其議遂定是歲初議
于太上皇帝尊號中加憲天體道四字皇后加慈仁
二字某草詔云太上皇帝與天同大體道之宗太上
皇后如月之明以慈為寶蓋取文意之順耳將宣布
而議者謂天聖二年賜太宗女申國大長公主謚曰
慈明當避於是改用明慈二字宰執云詔書先明而

後慈殆默定也

某與同直院鄭仲蓋間既分草皇帝請加上太上皇帝
皇后尊號牋表諸公謂太上皇帝自當答誥頗疑皇
后難於措辭某請以意共為答誥文意所及總言父
母以該之而不稱予吾之類遂草以進上甚以為然
凡兩答誥皆某所草也

上於文字尤欲得體一覽便見是非某草太上辭尊號
第一誥其末云怡神閤居何力之有上曰此雖道太

上語畢竟自此起草送去何力之句不能無嫌某遂改作無累於物蓋上用意至到如此

淳熙二年六月禮部太常寺申來年太上皇帝當慶七十欲將國朝加上尊號并上壽典禮參酌比附先次討論壬申有旨恭依七月乙酉侍從禮官等就都堂議加性仁立德至神無為八字而皇后再加二字為齊明廣慈後兩日禮部趙侍郎雄謂無為二字與太上字相連頗涉語忌請改為明武煥文其後又嘗作

無為至神又作成武煥文逮癸卯乃定用性仁立德
無為全美參政龔實之茂良而下尚不以為然葉承

相衡

既主之衆莫能奪八月直院胡長文元質罷丁

卯上自用某再直已擬詔草會九月乙未葉丞相罷

龔參首招予及學士王季海淮

共議然後定為性仁

誠德經武緯文遂草宣布詔其頌太上皇帝云以德
行仁本性誠之固有修文偃武合經緯之自然太上
皇后云月齊日以得天而能久照坤順乾而配地是

以廣生上再三稱獎謂數句用經語該括明脩非卿不能為真大手筆也

大禮降御札既云札示則當親筆付外近歲同常詔從院吏寫本行出未知中朝舊事如何乾道九年六月七日宣當直學士草南郊御札三更進草其間云乾清坤夷振四方之綱紀星輝海潤兆百世之本支玉卮每奉于親闈瑞節歲交于鄰境上改作農扈屢豐戎軒載戰崇禮樂而四達嘉風俗而再淳玉卮每奉

于親闈美化遂刑于海宇仍批云可改簽抹者五句
意不近于郊祀其欲得體大率如此

淳熙六年三月丁卯詔今歲郊祀以例約束省費旋有
旨未令行出下禮部太常寺議明堂大禮初李仁甫
主此說于前郊嘗經集議會近習楊言燾博極群書
却不曾讀孝經乃不果行至是某以禮部尚書兼翰
林學士與諸儒議曰周公雖攝政而主祭則成王王
方幼冲故周公參稽古制歲事于明堂其曰嚴父者

措周公能推本武王之志追尊文王之功非謂自王
其祭祀也衆以為然遂奏臣等竊觀傳載黃帝拜祀
上帝於明堂虞祀五帝於五府歷時既久其詳莫得
而聞至禮記始載明堂位一篇言天子負斧扆南鄉
而立內之公侯伯子男外之蠻夷戎狄以序而立故
曰明堂也者明諸侯之尊卑也孟子亦曰明堂者王
者之堂也周禮大司樂有冬至圜丘之樂夏至方丘
之樂宗廟九變之樂三者皆大祭祀惟不及明堂豈

非明堂者布政會朝之地成王時常于此歌我將之
頌宗祀其祖文王乎後暨漢唐雖有沿革至于祀帝
而配以祖宗多由義起未始執一本朝仁宗皇祐中
破諸儒異同之論即大慶殿行親享之禮並侑祖宗
從以百神前期朝獻景靈宮享太廟一如郊祀之制
太上皇帝中興斟酌家法舉行於紹興之初亦在殿
庭蓋得聖經之遺意且國家大祀有四春祈穀夏雩
祀秋明堂冬郊祀是也陛下即位以來固嘗一講祈

穀四躬冬祀惟合宮雩壇之祀猶未親行今若特舉
秋享于義為允臣等謹據已行典禮及前代賀循本
朝名儒李太白范鎮明堂嚴祖說并治平中呂誨司
馬光等集議近歲李燾奏劄具錄以聞乙亥有旨從
之九月上辛以顯肅后忌前改用仲辛行禮辛酉當
受誓戒前一日上語宰執足指瘡腫恐妨拜跪欲展
季辛又值顯恭后忌如何宰執奏天地尊后忌畢遂
降旨用二十六日某按漢武帝太初太始正和中屢

祀明堂不專用辛方請別卜日詰朝上忽遣中使
諭旨都堂夜來敷藥足瘡良愈不必改日但已展誓
戒之期若再降旨不張皇否趙相奏此却無妨遂以
是日午時集官受誓戒丙寅大雨丁卯鎖院草赦戊
辰百執事冒雨入麗正門過後殿請皇帝致齋己巳
上乘逍遙車朝獻景靈宮入太廟齋宿四日之間雨
晝夜傾注通衢殆如溪澗有旨來早不乘玉輅止用
逍遙車徑入北門趨文德殿致齋朝服導駕官俱改

常服一應儀仗排立人並放趙相為大禮使密旨有
司未得放散黃昏後雨驟止夜分內侍李思恭傳旨
御史臺閣門大常寺仍舊乘玉輅應合行事件疾速
施行庚午昧爽駕來登輅某執綏上喜曰且得晴霽
辛未行禮月色如畫上拜起不倦以迄于成黎明登
樓肆赦簪花過德壽宮人情熙然赦書乃某視草其
間云惟周成宗祀洛中陟配于文王惟漢武合祠汶
上推嚴于高帝皆用親郊之禮且殫尊祖之誠於鑠

本朝若稽前代假經路寢有皇祐之曩儀徧秩羣神
有紹興之近制不愆於素可舉而行蓋欲明著古禮
以示來世也後數日加恩羣臣某復草趙相制云裸
將太宮霖潦驟霽陟恪大寢月華正中又云鎮定大
事如彥博之恢宏貫通羣經如宋庠之博洽皆紀一
時之事且以仁宗初行明堂二公實為相也

大禮赦條乃六部諸司條具上省省中類聚取旨訖即
進熟狀降付學士院草赦文本院并首尾詞大書進

入其間多云當議將上取旨蓋有司擬申如此既經
畫旨行赦便是處分不應仍舊用當議二字某為學
士諭令削去院吏持不敢遂親以筆塗之

大禮上乘玉輅率命翰林學士執綏綽顧問近歲多闕
正員臨時選差他官與五使同降旨淳熙丙申南郊
已亥明堂某再為之按京師用唐顯慶輅嘗以登封
其安固可知元豐改造已不能及今乃紹興癸亥歲
所製上自太廟服通天冠絳紗袍乘輦至輅後由木

陞以登惟留御藥二宦者侍立執綏官先從傍用小梯攀緣而上衛士以綵繩圍腰繫于箱柱輅行頗搖兀宸几亦覺危坐云

大禮後上御樓揭鷄竿肆赦皇太子及文武百僚拜舞于下惟樞密使翰林學士相對侍立樓上丙申己亥某因危從登麗正門望濤江形勢環抱極壯觀也

乾道七年四月甲子詔皇太子判臨安府用至道故事也或謂當以大中大夫為判官通領府事恐名稱未

正遂議改尹而以侍從為少尹餘判推官用卿監郎
官丁卯將鎖院降麻或又疑宣麻給告非待儲貳之
禮已已後省官禮官會議于史院檢點唐太宗征遼
命太子監國及文帝命太子受諸司啟事或詔或制
視麻為重可以作則上然之庚午偶當日被宣范紫
薇成大先以侍講遞宿間報遽出薄暮至玉堂御藥
李^名_{忘其}持御封御筆皇太子某宜領臨安尹可依此
降制三鼓進草因奏此制書既不給告則當付有司

施行竊恐皇太子別無被受欲依此來詔書體式略
換首尾書寫一通降付皇太子今擬定格式進呈如
賜俞允乞速批降付下御筆批依辛未遂告大廷惟
此稀濶盛典造以史官脩討論詞臣參潤色復得宸
翰寶藏于家豈非儒生之榮遇乎

答皇子詔用卿字非是前輩知體則不然其他或女或
王或公皆當有別

翰苑歲進春端帖子如大內多及時事太上則咏遊幸

之類某常自德壽宮後偶趨傳法寺望見一樓巍然
朝士云太上名之曰聚遠而自題其額仍大書東坡
賴有高樓能聚遠一時收拾與閤人之詩于屏間有
靈隱寺冷泉亭臨安絕景去城既遠難于頻幸乃即
宮中鑿大池續竹筒數里引西湖水注之其上疊石
為山象飛來峰宛然天成某作端午帖子云聚遠樓
頭面面風冷泉亭下水溶溶人間炎熱何由到真是
瑤臺第一重蓋謂此也前後頗聞禁籞大略併記于

下宮中分四地分隨時遊覽東地分香遠梅堂清深

竹堂月臺梅坡松菊三徑菊笑芙蓉竹清妍醖清新木犀笑

蓉岡南地分載忻大堂御宴處忻欣古栢太湖石射廳臨賦荷花

山燦錦金林擒至樂池上丈紅郁李清曠木犀瀉碧養金魚處

西則冷泉古梅文杏館靜樂壯丹浣溪大樓子海棠北則絳華

羅木早船俯翠茅亭春桃盤松其詳不可得而知也嘗

見御製盤松贊墨本云天錫瑞木得自嶽岑枝蟠數

萬幹不倍尋怒騰龍勢靜奏琴音凌寒鬱茂當暑陰

森封以腴壤邇以碧潯越千萬年以慰我心碑在宮

中又汪季路

達

得御製祭土地文藁真蹟寶藏之其

文云維淳熙五年歲次戊戌十一月日太上皇帝遣

具階張宗尹特設牲牢旨酒珍果香花致祭于本宮

土地之神神有百職職各不同典司草木土示是供

我游湖園乃獲奇松植之禁苑百態千容婆娑偃蓋

夭矯騰龍翠色凝露清音舞風醉吟閑適予情所鍾

壅培封殖久或力窮烏鳥外擾蟻蠹內攻神其勦絕

勿使能終精邪竊據盜斧造蓬神其呵逐勿使遺蹤
常令勁質坐閱隆冬堅踰五柞弱異雙桐歷千萬年
鬱鬱葱葱牲牢旨酒嗣錄汝功尚饗

歐陽文忠公學士院草錄世已不傳近歲有玉堂集云
是李漢老^師編類亦差訛非全書其中却載皇太子

府春端帖子蓋政和宣和間所供今東宮乃闕北欲
引例為請緣無善本可據且當時不曰宮而曰府遂

止

安中內制
一例曰閣

文忠集卷一百七十四

欽定四庫全書

文忠集卷一百七十五

淳熙玉堂雜記中

宋 周必大 撰

乾道七年十二月辛酉有旨僕射之名不正欲採周漢舊制改左右丞相令有司討論某時為禮部侍郎兼權直學士院又兼同脩國史兼實錄院脩撰皆當與間會衆議不齊而虞丞相亦謂同北人官制遷延至明年正月戊寅僅條具歷代宰相官稱申尚書省禁

中即聞之明日遣中使王

忘其名

來問緩故某以實奏

二月癸卯得御筆云尚書右左僕射可依漢制改作
左右丞相學士院降詔登時具草封入乙巳付外施
行庚午從駕過德壽宮既歸得旨赴東華門祇候宣
引日已晡聞有內宴小黃門出云恐改日引然不敢
退酉後忽宣入選德殿起居畢上微被酒袖出親札
云比來一二十大臣同心輔政夙夜匪懈漸草苟且之
風以副綜覈之意深可嘉尚今因除授宜示褒典虞

允文可特進左丞相梁克家可正奉大夫右丞相御
前設小案用牙尺壓蠲紙一幅傍有漆匣小歛硯寘
筆墨於玉格某鞠躬書除目進呈訖奏曰拜相轉官
前例固不一今並命而或三或四更取聖裁上曰以
其協心故褒進之然特進一官即少保所以允文三
官又問兼樞密使否上曰今樞密亦非古先改丞相
稱呼將來別理會且帶可也又奏所領書局上曰卿
自理會賜坐奏問既改左右相其序位如何上曰欲

升在三少之上三公之下逮閣請起宣坐賜茶飲訖再拜而退御藥李彥真同自複道秉燭鎖院蓋上意欲其密故不用尋常宣官之禮金蓮故事今庶幾焉

凡鎖院御藥監門中官各一員御藥留宿其廳

鎖赦或先

去恐是大禮別有職事

昧爽再相見以小字制書本授之送至

中門先所鑰入內即復局院俟朝退宣麻訖學士乃得歸時虞公獨相梁為參政聞班列中但謂改易相名及雙制出愕然咸疑學士多轉右相一官有所抑

揚不敢辨也按祖宗時命相多以舊官其後往往遷秩近歲勅局脩三省法乃著令轉三官茲豈當立法乎

乾道七年七月二十六日午後快行家傳旨下學士院取從官為四川宣撫使體例蓋是時叅知政事王公

明炎在蜀三年屢求歸宰相薦吏部侍郎王能甫之

奇為代故來索例某令回奏云降麻官方屬本院侍從當問三省既暮忽宣鎖至院已秉燭中使出御封

御筆乃王炎除樞密使依舊四川宣撫使其密如此
吏寫熟狀依例不轉官但加食邑某方草制未暇細
思既得筆依奏方省其誤自寫奏云本朝改官制後
以大中大夫為宰相官當時改樞密使為知院事中
興以來既復置使首用舊弼故恩數多視宰相未有
以中大夫充者昨汪徹先是通議大夫虞允文大中
大夫故不轉官今王炎是中大夫竊慮合轉左大中
大夫仍加封邑庶協近制筆批依時近三鼓批墨尚

濕

某初直院見批荅臣僚章表皆大書其後不過三兩行
表紙盡則接以詔紙數幅文盡乃止然表紙高詔紙
矮參差不等問之掌故並無依據心每疑之其後徧
於執政故家求承平時舊本偶得仁宗皇祐間荅孫
威敏公馮求免副樞表則所接之紙高低相若淳熙
乙未再叨寓直閏九月十二日因李參彥穎王樞淮
斷章批荅即具奏照皇祐體式于表後用一等紙書

寫進呈仍乞今後准此施行御筆批依遂為定制

宰執及親王使相太尉生日天章閣排辦牲餼預申學

士院撰詔書及寫賜目一紙各請御寶

詔用書詔之寶賜用錫賜

之寶前一日差內侍持賜其詔例畫撰進之日謂如正

月旦生文意必叙歲首而所畫日則是去臘殊不相

應某為直院奏乞不拘進詔早晚但寔畫生日于後

得旨從之遂定為制祖宗時牲餼外又錫器幣往往

就差子弟姻戚持賜欲其省費也過江惟牲餼耳米

麵本色羊準價皆取之有司酒則臨安醞造臨時加
以黃封拜賜訖與使者同升廳搢笏展讀就坐茶湯
書送錢十五千從人三千天章閣使臣庫子快行錢
酒各有差

淳熙三年八月庚辰德壽宮遣大璫張去為至都堂傳
旨立翟貴妃為今上皇后明日午後執政奏事皇后
歸姓謝氏乙酉晚快行家來宣鎖院是日侍講刑部
侍郎程泰之已宿直呼馬而出子至內前適與之遇

泰之揚鞭云留詩案上矣酉時自東華門入對選德
殿上曰太上有旨立謝后命卿草制某奏合畧及歸
姓否上曰不如此四方何由知明言幼隨乳母可也
宣坐賜茶訖御藥王濛同入院二鼓後進草畢吏呈
泰之詩云抖擻身章却冒塵褻疏顧影也逡巡鑿坡
寓宿非其地蓮燭搽文自有真字直由來同古語位
高兼復見今人迎潮有諾無輕爽季老當年不諉負
謂賜金也予次韻戲之云天街並踏軟紅塵飛鞚交

馳駭徼巡椒殿敢期當相制槐庭元擬用儒真

初謂年兄

入相

鎮院鸞方偶免冬龜手遮市深慙日攫人禮絕同僚

應有日重霑潤筆乃無貧謂相制亦賜金也先是七月十九日六曹長貳六人往浙江亭觀潮泰之在焉惟予以內直不赴哺時大雷雨走筆戲蔡子平洸云雷轟萬鼓勒潮回無復亭前雪作堆應為尚書慳且澁盲風怪雨一時來迎潮輕爽之語指此

淳熙三年八月乙未都堂召議賜交趾來年曆日詔書

予謂李天祚去冬已薨龍翰未經封拜欲作安南國王嗣子龍翰執政然之先是予以兵部職事條具天祚贈典按故事其王初立即封交趾郡王久之進南平王死則贈侍中南越王上以天祚自紹興丁巳嗣位今四十年淳熙元年二月又自南平王特封安南國王故欲厚其禮予請仍贈侍中追封南越國王詔可以安南為國蓋曾丞相之失聞奏章行移舊止稱安南道加封之後浸自尊大文書稱國不復可改丁

酉三月二十四日制授龍翰靜海軍節度觀察處置
等使特進檢校太尉兼御史大夫上柱國安南國王
食邑三千戶實食封一千戶仍賜推誠順化功臣子
適當制其云即樂國以肇封既從世襲極真王而錫
命何待次升蓋言不封郡王也交州在唐為安南都
護府本朝太宗時黎氏奪丁璿節度大中祥符三年
李公蘊復篡之傳子德政至孫日尊嘗稱帝改元曰
尊卒乾德嗣卒陽煥嗣卒天祚嗣卒龍翰嗣生數歲

矣制云乃眷一邦茲傳七世自公蘊言之也其名曰
日日乾曰陽曰龍皆有僭上之意然表章字如蠅頭
幾不可辨玉音每嘉其恭順云

淳熙三年九月二十五日鎖院付下中書門下省熟狀
趙伯圭除使相提舉洞霄宮某奏按故事宗室戚里
或前宰執帶節度使多充宮觀使若至使相自領使
無疑昨史浩以使相提舉宮觀者誤也恐自此遂以
為例今具士樽錢枕等例皆是以史相充宮觀使在

外任便居住者合取旨改正一更四點進入五點上
批可依士樽等體例除官觀使

是年十一月二十二日御封付下叅知政事錢良臣辭
免監修國史日厯所劄子降詔不允某因奏自來宰
執兼領尚局多是內尚書省批出局名既至朝廷降
勅合行寫正而省吏止奉行內批宰執亦隨勅黃繫
銜差誤日久今因荅詔輒具言之國史日厯者書名
也曰所者官司也今大臣合監修日厯却添一所字

似監修造作之官又如勅令所從官詳定宰執提舉
今却云提舉勅令所此何理也以至國史院會要玉
牒皆為一律合行改正止以為允其後或是或不復
混淆矣

丁酉九月丙辰宣召侍讀史少保浩錫宴澄碧殿抵暮
送以金蓮燭宿玉堂直廬上命作詩叙此會史進古
詩三十韻云季秋中澣日淳熙隆四禩朝回攬轡間
中使俄傳旨少頃日轉申宣召陪燕喜預令歸玉堂

深夜偃棲止悚懼跼承命鳴騶亟穿市絳闕聳皇居
霏裡常靡靡入自東華門熊羆森爪士詔許乘肩輿
安徐無跛倚復古距選德相望幾數里修廊接雲漢
岩崑燦珠藥中途敞金扉恍若蓬壺裏郡山擁蒼壁
四顧環弱水山既日夕佳水亦湛無滓冰簾映綺疏
瓊殿中央峙澄碧耀宸奎龍神爭守視蹈舞上丹梯
天威不遠咫尺奉觴祈萬壽時蒙一啟齒餘波丐鼠腹
酒行不知幾徘徊下瑤席緩步煩玉趾從遊至清激

錫坐談名理泉聲韻瑟琴一洗箏笛耳皇云萬幾暇
觀書每來此論道及帝王直欲齊其軌堯舜禹湯文
前身無乃是臣言非獻腴道實由心起既然明是心
要在力行爾登橋醕餘鑒飲興未容已金蓮引雙燭
再拜離階咫尺玉音寵諭臣此會宜有紀歸途感恩榮
占馮忘骭轍上御製俯同其韻云揖遜荷帝堯寅恭
五元禊治道貴清靜聖言有深旨誰歌元首明自得
股肱喜躋民期仁壽詎肯中道止力農樂彼田坐賈

安於市歲行閱豐登國論銷委靡予力初何能濟濟賴
多士矧予有元老中立而不倚居東逾三年不遠來千
里未遂赤松遊輒誦青琅藥皓首持六經日侍明光裏
翼乎鴻遇風縱矣魚在水儒行絕瑕疵道心無塵滓挺
挺松栢姿巉巉山岳峙予惟日萬幾至仁同一視西成
錫小宴促坐才尺咫湛露愧歌周置酒非封齒歸美見
親詩如卿能有幾眷言澄碧行勝賞得迂趾亦屢引公
卿對此譚政理虛心欲愛人忠言資逆耳朕瘠天下肥

至樂無易此頗念文武疆六合尚殊軌東都會諸侯宣王
昔于是期爾罄嘉謀使我勲業起勿以方燕頤所書聊復
爾卮酒正須酬話言未能已都護萬年觴何當至庭祀文
章藉老手直筆中興紀載嘉矍鑠翁焉得辭翫敝逮十一
月壬寅輪當內直申時二刻宣召至清華閣上曰學士
宴見無時最為親近朕和史浩詩待錄示卿可和以進
此學士職也又云卿想不甚飲比賜宴時見卿面赤却
至誠不辭既退中使李肅傳旨賜詩本并戊戌小春茶

二十銖葉世英墨五園以代賜酒世英御前墨工也
恭進和篇云粵從三代還歲月過千禩時豈無賢君
道未契宸旨

陛下屢語臣三代而下人君皆不知道

煌煌唐太宗勲業

在所喜寇攘既掃除蠻貊畢至止循良布郡邑惠政
寬獄市忠賢儼班聯切諫梃浮靡開輔羅府岳岩穴
聘奇士民生覆孟安國勢秦山倚皇心期過之風下
九萬里忠厚培本根文物燦華藻淳熙視正觀何啻
相表裏屬車尚濤江列障隔淮水蠹茲獯鬻氏作我

太清澤坐令營屯衆久費糗糧峙中原厭狼貪諸將
空虎視安得貫砮櫜來貢尺有咫六合混一家耕桑
盛生齒願言講治道先務當有幾欲仁斯仁至患在
未舉趾而况前史中遺事可尋理衛英爪與牙王魏
目兼耳處中賴房杜虛受忘彼此不聞國異政但見
車同軌孰云古道難貪曰今王是寸陰聖所競盛德
日方起舞千格三苗其效七旬爾軻稱仁無敵傳謂
禮可已東靺及北女看即朝玉祀南山竹易殫陛下

功難紀儒館漫獻歌將奈詞之體是日奏事畢問陛下命臨安府開文海有諸上曰然奏云文選之後有文粹已遠不及所謂文海乃近時江鈿編類殊無倫理書坊刊行可也今降旨校正刻板事體則重忍難傳後莫若委館閣官銓釋本朝文章成一代之書上大以爲然曰卿可理會奏乞委館職上曰待差一兩人其後遂付呂伯恭祖謙既成上問何以為名某乞賜名皇朝文鑑上曰善又降旨令某作序亦既進呈

將刻板會有近臣密啟云所載臣僚章疏毀及祖宗政事遂不果刻今幸其書士大夫或傳之

淳熙五年閏六月十二日鎖院付到熟狀皇子魏王自荆南集慶軍節度使開府儀同三司行江陵尹判明州改成德彰信軍節度使行荊州牧某奏彰信是曹州徽宗曾為節度使即位後升興仁府又親王帶牧合隨本鎮今成德軍即真定府却帶荊州牧非是上批別擬大鎮進入選點更具本鎮帶牧故事來某又

奏去夏魏王除荆南節度使江陵尹誤犯端拱中真
宗除授昔政和中已失檢典今因改鎮不敢不審
兩鎮合帶兩牧仍隨本鎮併於實錄中檢故事以進
夏夜甚短奏入已三鼓至四鼓未批出只於兩鎮上
就本鎮止帶一牧某遂擬永興成德軍節度使雍州
牧進入頃之點定然後進草禁中未就寢以待
禁中
四鼓
乃在外
三鼓

故事食邑千戶以上封侯若拜相雖舊爵卑食邑少亦

經封侯蓋五等伯子男用縣名至侯則升郡當降旨
時未知所封何郡第云進封開國侯而已秦丞相薨
後初拜沈守約該左相万俟元忠禹右相沈爵歸安
縣万俟陽武縣各從其鄉也既相合升郡侯而學士
院遂進沈為歸安郡万俟陽武郡初非郡名其誤甚
矣當時偶不知改久之因進書轉官方能釐正至今
遇恩升郡臣僚院吏及吏部尚復差舛謂如原係吳
興縣開國伯則合云進封吳興郡開國侯却云吳興

郡進封開國侯殊無義理予每為正之

北門掌內制西掖掌外制是為兩制又著令自觀文殿
大學士至敷文閣待制為侍從官朝廷或詔近臣舉
賢議事多云兩省諫議大夫以上尚書省侍郎以上
而別言御史中丞學士待制乃為詳脩近世相承通
稱侍從固已疑混若泛言兩制則非矣

紹興二十四年春直學士院湯公思退以禮部侍郎同
知貢舉時百官多闕大抵一人兼數職凡進士出身

皆入試闈獨留監察御史王公綸蓋脩折號也內制
既闕官遂降旨暫權遣草劉婉儀進位貴妃制太上
稱其有典詰體潤筆殆萬緡賜硯尤奇秦丞相不樂
遭論列而去秦薨召還掌內外制知樞密院事垂相
而病除大資政留守金陵即其鄉也未第時兄弟就
食府庠至是人以為榮尋卒官予在西掖嘗草其致
仕制云少則歌鹿鳴而薦于鄉老則釋麟符而居其
里考昔人而或有在近歲以幾希贈官制云古所謂

鄉先生者沒則祭于社而後世良二千石民亦嘗奉之爾于二者蓋兼之矣皆紀實也

故事正除六曹侍郎及雜學士以上遇辭免皆降詔不允給舍并權侍郎則否紹興二十七年六月戶部王侍郎師心辭給事亦降不允詔書蓋舊官各答詔也是歲九月權禮部賀侍郎允中除給事中辭免亦降詔乃誤襲王例非故事也三十年正月權工部王侍郎晞亮遷夕拜不復降詔得之矣明年九月權禮部

金侍郎安節亦遷夕拜又誤降詔自後往往無定論
院官隨事申明改正為善

文忠集卷一百七十五

欽定四庫全書

文忠集卷一百七十六

淳熙玉堂雜記下

宋 周必大 撰

詔報見於金坡遺事元豐元年八月丙申亦詔于尚書省樞密院用詔報至今守之其制首題學士院詔報尚書省或中書門下樞密院次入詞云云末云右謹具詔報某省伏候裁旨後題年月學士押字雖中間權臣用事官失其職獨此不廢又三省密院於百司

例用劄付惟學士院云劄送他官司得省劄必前連片紙書所受日月乃取押字惟學士院徑判押其首又吏魁有錄事曹按日房皆稍擬中書尊內庭也

祖宗時內制多避兩府親嫌亦有不許避者蘇文忠公

之於弟文定公是也然終不自安乞郡而去紹興初

范元長

冲

除學士以趙丞相

鼎

姻家特復置侍讀學

士以處之及秦丞相

檜

當國兄

梓

實為學士子熺繼

為學士承旨亦嘗為禮部侍郎雖並緣元祐故事其

實非也

國初凡為學士官至八座已罷職或再來直院神宗改
官制後中丞并權六曹尚書若兼內制亦止云直學
士舒亶等是也中興初詹又已為龍圖學士猶曰權
直院其他如正侍郎已下多帶兼權汪濂等是也厥
後程克俊林待聘楊愿等初以給舍兼權稍久乃落
權字以為恩數至正尚書則帶兼權學士胡交修等
是也乾道三年洪景廬邁奏請自庶官遷侍從便落

權字正兼直院故先以起居郎權直院遷中書舍人
即落權字庚寅秋予以少蓬兼權直院明年正除權
禮部侍郎吏引近制申明合正為直院予固抑之兼
權如故翰長王日嚴曠亦不復問其後王季海淮以
太常少卿兼權直院既除三字即徑落權遂為定例
淳熙五年十二月某自翰林遷禮書乃正兼學士蓋
上以所兼之官在正官下者皆不帶權非舊例也六
年十一月遷吏書又升兼學士承旨且有內批付院

云天官事繁今後非特旨撰述其餘並免

上自登極至今將二十年正除翰苑纔七八人皆登二

府惟王日嚴以年踰七十除端明殿學士而去

乾道癸巳曾丞相

懷

鄭叅政

聞

張樞密

說

在二府或薦

新政官正字崔大雅

興詩

入內庭以其資錢乃創翰

林權直之名月俸減學士直院三之一

自學士承旨至庶官兼權

直院者俸給一等

院中餐錢不減明年冬以父憂去尋丁母

憂戊戌秋服闋復召為翰林編修官史丞相

浩

當國

下史院討論兼職名稱遂改為學士院權直蓋以翰林乃內諸司總名難專指學士院也

淳熙六年明堂大禮崔大雅已遷著作權直如故糧料院止隨其官幫支賜二十疋兩大雅以狀申秘書省省申朝廷趙丞相雄將上取旨遂用月俸例支學士三之二

祖宗試文多在學士院近歲惟試館職耳既得省劄召某人試即下太史局擇日報內侍省着官一員充監

門前一日學士宿院進策題俟內批依次早乃引試
支左藏庫錢三十緡充餐錢試畢錄策題并試卷依
紹興元年指揮用諸報封送尚書省然後取旨除授
中間館職多不試紹興三十年司諫何通遠溥以為
言太上欲復故事而人頗憚試首召朱熙載等次召
劉儀鳳等皆辭不就太上諭湯丞相思退等擇二人
必令試且云蘇軾中制科猶試况餘人乎于是以予
及同年程泰之大昌應詔具宣上旨乃不敢辭已而

太上欲除校書郎或謂過江選人無此例止除正字

乾道六年九月予以秘書少監寓直翰苑發策試王

仲衡希呂嘗賦詩寄程同年云當年給札踏金鑾重

到依然九月寒學士策詢學士策館職亦合呼學士秘書官

試秘書官自憐綠髮非前度尚喜青衫絕一般時予服綠

寄語浙東程閣老程時為浙東提刑兼權帥事亦嘗暫直翰苑莫務紅旆

笑儒酸程荅詩末句云有底滑稽堪羨處金蓮燭底

語窮酸始予庚辰九月與程同試兩人名皆有大字

明年試蔣芾為曉姓名俱連草頭又明年試王東里
程千里名連里字頻歲偶爾亦可書也按祖宗朝館
職者指昭文集賢史館之職也在內多升修注出外
則為帶職凡轉官奏補恩數皆厚故難其選必試而
後除亦以限止無能之人自神宗罷館職止是秘書
省官與其他職事官無異不當尚循館職之名況狀
元不試餘人多徑除著作丞郎所試者校書正字而
已舊制云試前一日學士宿院故元祐中蘇文忠公

與鄧文惠公

溫伯

各進策題禁中點用文忠所作及

予與程同試時學士洪景嚴兵部尚書兼權學士楊

元老

椿

亦並入至是予與鄭仲益同直鄭為長官典

故浸移乃始輪入不敢強之其後予直丙申二月召

試許蒼野遂修故事約程元成

叔達

並入策題則輪

撰

隆興初上用真宗故事輪講筵學士院官直宿禁林每

夕兩員以脩宣引咨訪往往賜酒留款其後以兩人

難留召若同名則議論難盡止命一員遞宿自後並
遞其選或國忌妨行香若有故員少及大署皆權免
間遇除授宣鎖講筵官已入直率聞命蒼黃而出至
有不及伺候從吏借馬于內諸司者或偶值本院官
直宿遂留鎖院若大除拜當有錫賜則不係當日與
否往往特宣云

每直兩日謂
之頭直末直

紹興辛巳明堂禮成以元顏亮背盟十月四日詔今次
明堂大禮合加恩臣僚權宜不鎖院不宣麻止降制

給告並免辭免候事定日依舊隆興二年遇事改卜
郊乾道三年冬雷罷二相皆未暇舉行乾道六年某
始奏復舊制

內制名色不一倖直時或未詳其體式故凡詞頭之小
者院吏必以片紙錄舊作于前謂之屏風兒予嘗跋
王岐公蘇文定公詔草及謝表脩言之至今不廢蓋
其來久矣國初陶穀謂一生依本書葫蘆殆謂是耶
凡鎖院或親被旨或受熟狀本院即關閣門今月某日

有鎖院事閣門得之即關報御史臺集文臣職事官
承務郎釐務官通直郎以上明日赴文德殿聽麻宰
相樞密皆不往惟輪參知政事一員押麻麻卷自內
出閣門啟御封兩吏對展官贊舍人南面搢笏叉手
大聲摘首尾詞及階位姓名下數句并所除之官而
讀之不盡宣也聽訖知閣門官以授參政改付中書
吏百官不拜而退若大詔令及冊后之類則宰執文
武百僚俱入文亦盡讀拜舞然後退

禁中以鎖院為重淳熙三年慶壽赦凡降麻官合加恩者用辛巳明堂例鎖院宣制仍勿辭免九月三日中

書進熟狀王

愷

思

一作恩

平郡王

璩

永陽郡王

居廣

並加食邑食實封只乞降付院草制內夫人失于詳
闕宣鎖程直院是夜進草明日告廷如式又明日內
批付密院典字直筆吳慶慶降充紫霞帔不令供職
主管內公事慶國淑懿夫人劉從信降兩字夫人
蓋懲其誤也

凡非時宣召院官

侍從以下及外官而內外者同

紫窄衫絲絢行入殿

廊有小黃門來導至便坐上服紅半臂

忌前用黃

黃門贊

拜揖升殿奏對訖上曰且坐先已設小杌子得旨則

側身虛揖而坐將退黃門贊云宣坐賜茶於是中官

進御前者忠佐授臣僚者賜酒亦然所用盃不同侑

以果實一釘其器分大小若二府則黃門雙導上亦

服窄衫宰相樞使坐高杌子執政紫團坐而低賜茶

酒亦如之或曲宴則酒五行亦或加多海盃賜食初

無定制

中興後凡除拜節鉞以上多由中書進熟狀院吏云鎮中左者文臣也右選者武臣也逐房臨時呼院吏取索是以知之惟草后妃太子宰相麻則不容知快行數十輩來宣召云鎖小殿子既至便殿上服帽帶諭以除授之意御前列金器如硯匣壓尺筆格糊版水滴之屬幾二百兩既書除目隨以賜之隆興初猶用此例乾道以後止設常筆硯而已退則有旨打造不

及例賜牌子金百兩立后升儲倍之

凡除拜加恩官在都下者既宣麻而院吏私錄本走報希覬贈遺初無公移也而被受之官辭免者多云準學士院報麻除授云云此非典故不應相承以為例獎諭臣僚或降詔或勅書院中自有定式近歲如大理獄空及監司守臣有勞蹟若是庶僚皆合降勅書三省樞密院往往誤批降詔院吏隨所得旨而行不敢止也

翰林院學士印六字為文背鐫景德二年
少府監鑄上兩字微刻自南渡後百司印無此久者
尚書六曹惟禮部印是舊物然亦元豐改官制後所
鑄蓋文書稍簡故不刻耳

紹興辛巳五月詔學士院權寓皇城司而以院為欽宗
几筵殿終制復舊

學士院舊號北門今在行宮和寧門內蓋沿北門之制
地迫皇城極為窄隘汪尚書

應辰

兼權學士時上屢

令增葺竟以無地步而輟廳後即堂緣近歲院官止
二員故分東分西兩閣中有小龜頭榜曰摘文堂蓋
在京徽宗因廣直廬御書以賜強承旨淵明今乃汪
彥章內翰恭所篆太上又嘗書玉堂二字賜學士周
茂振麟之刻石廳上

東閣窓下甃小池久無雨則涸傍植金沙月桂之屬又
有海棠郁李玉繡球各一株西偏植金橘逼城根株
不能大花開時香滿院結實雖小而甘浙中未易得

也淳熙己亥夏侍講兵部尚書兼給事中王仲衡入
直示兩絕句云玉堂晝永暑風微簌簌飛花點小池
徙倚幽欄憑闕訊夏鶯飛出萬年枝小池倒影弄餘
輝照耀虛簷極出奇木杪不鳴風力軟闌萍翻藻有
魚嬉予次韻云東省南宮切太微夔龍行集鳳凰池
更哦殿閣薰風句坐覺微涼生桂枝紫禁同依日月
輝蒼顏獨愧羽毛奇水如明鏡雖堪俯笑汝皇皇誰
肯嬉予嘗發策試仲衡至是同為八座俱在講筵唱

酬頗多是詩及院中景物故記于此

朝殿日皇太子宰相親王使相參政各有朱衣吏二人

自下馬處前導至殿門

樞密使恩數依宰臣者同若知院及副樞簽書則紫衣

此外惟翰林學士有之又禁門內許以茶鐐擔子自隨與執政等

車駕將出孟享或過宮則應奉官及侍從以上朝於後殿宰執有奏事侍從先退例過玉堂少憩若值冬至元正則團拜堂上俟駕過就院門外上馬以從

南渡以來朝臣遇節序賜予多權停今經筵寒食重五
冬至尚賜節料錢酒其他侍從則三大節客省齋賜
羊酒米麵而學士院官若侍從以上兼領自從本官
或庶僚權直院獨三伏賜米一擔時果五品品纔一

櫟亦因與經筵官輪宿而得之書局

有中官承受凡
遇時節例賜茶

酒學士院無
成受故也

淳熙乙未初伏某以待制侍講經筵賜

流香酒四斗

後二年
減半

時果七櫟冰一擔視庶官值院

為稍增以短表謝支快行家食錢三千又折酒錢三

百別賜冰一擔

翰林司關子云限日下支不許次日

支食錢一千蓋待

從所得者

十月旦賜錦襖子學士觀察使簇四金鵬賜尚書執政
八搭暈錦宰臣使相天下樂例從左帑帑支不得以
臨期隨品色假為領袖施之朝服三日而止識者非
之予自翰苑遷八座已亥十月值從駕恭謝景靈宮
兵部尚書王仲衡未達朝議第用市錦子告之故計
無所出予輟所服予之而馳取舊金鵬者自用暨追

班閣門吏魁趙軫與其徒顧予諄語予悟其意呼而告以雖班尚書猶兼翰林學士故可舍高從卑軫等愧謝而退

渡江後每遇開講罷講臨安治具宴侍講讀修注官紹興三十二年冬予為左史趙清卿

子滿

知臨安初獻

議盡罷百司饋送及所供飲饌時洪景嚴以內翰兼侍讀開講日學士院自置酒五行自後遂為例乾道六年予與鄭仲益兼侍講是秋開講鄭主席謂予亦

院官當與其事予但簽書招客之目而以不兼講讀
不赴坐時胡邦衡銓以工侍兼侍講坐市賦覃字韻
詩見及予次其韻有云寓直敢同東道主蓋謂是也
翰林學士初上舊制勅設甚盛中興後不復舉行予直
院時除王日嚴為學士院中支餐錢具五杯而已

故事大宴每於是日則學士院為館閣官具食蓋祖宗
時內外制官無不自三館出館中之人往往前日僚
友之舊道義之交不專以勢利高下為心故每于是

日小集從容談笑也近時具食雖如故乃設于學士
院門幕次內蓋未嘗見玉堂主人也竊意前輩不爾
淳化中太宗以飛白玉堂等四字賜翰林而學士承
旨蘓易簡會兩制于玉堂直秘閣潘謹修與焉畧可
見也已上乃近世程致道修麟臺故事所記乾道七
年天中節貢院賜齋筵予時以少蓬兼內直乃督院
吏治具吏白廚庫之錢兼近已不講予曰故事既難
廢况予身貳秘書而罷此禮乎命如故例然不過盤

餐之類爾

某久在翰苑獨員之日常多率數月輒丐去上必批降
詔不允院吏申省乞時暫差官撰述乃委中書舍人
如此再三遂為定例徑封奏劄付中書後省

數年來上數令薦詞臣為代明示大用意某每退避戊
戌九月丁丑御藥院傳旨問近例院官有無三員者
吏具上初政承旨洪遵學士史浩直院劉珙又問紹
興間故事吏復具八年曾開列龍如淵皆為直院而

召孫近承旨三十一年何溥為學士而虞允文劉珙
並直院後旬餘崔大雅服闋還朝上曰卿來適其時
遂再兼權直十月復增莫子齊濟尋卒其後繼增趙
大本彥中熊子復克子遂參預

文忠集卷一百七十六

欽定四庫全書

文忠集卷一百七十七

二老堂詩話上

宋 周必大 撰

陶淵明山海經詩

江州陶靖節集末載宣和六年臨漢曾紘謂靖節讀山海經詩其一篇云形夭無千歲猛志固常在疑上下文義不貫按山海經有云刑天獸名口銜干戚而舞以此句為刑天舞干戚因筆畫相近五字皆訛岑穰晁詠之

撫掌稱善予謂絃說固美然靖節此題十三篇大槩篇指一事如前篇終始記夸父則此篇恐專說精衛銜木填海無千歲之壽而猛志常在化去不悔若併指形天似不相續又況末句云徒設在昔心良晨距一本作駐可待何預干戚之猛耶後見周紫芝竹坡詩話第一卷復襲絃意以為已說皆誤矣

東坡立名

白樂天為忠州刺史有東坡種花二詩又有步東坡詩

云朝上東坡步夕上東坡步東坡何所愛愛此新成樹
本朝蘇文忠公不輕許可獨敬愛樂天屢形詩篇蓋其
文章皆主詞達而厚好施剛直盡言與人有情於物無
着大畧相似謫居黃州始號東坡其原必起於樂天忠
州之作也

王禹偁不知貢舉

小說多妄其來久矣王壺清話云王禹偁自知制誥出
知黃州蘇易簡榜下於孫何等進士三百餘人奏曰禹

偁禁林宿儒累為遷客臣欲令榜下諸生郊送奏可禹
偁作詩謝之云綴行相送我何榮老鶴乘軒愧谷鶯三
入承明不知舉看人門下放諸生予年十六七時嘗以
歲月推之孫何勝乃淳化三年歲在壬辰明年癸巳易
簡遷參政是時禹偁謫行外未歸又明年甲午方再為
知制誥至道乙未遷內翰五月出知滁州非放進士時
三年丁酉復召知制誥咸平元年戊戌十二月罷知黃
州二年己亥放進士孫暨等七十一人非三百人也且

易簡已為執政而死其妄甚明然予頗自疑此詩或為
他日之讖其後隆興癸未予為起居郎兼中書舍人值
省試本擬同知貢舉屬壽皇銳意幸金陵便欲進發留
予從駕不果差乾道壬辰為禮部侍郎兼直學士院造
當貢舉在朝闕出身從官而虞并甫為相雅不欲用予
時方遣泛使奏留予撰國書命翰林王曠知舉中書舍
人趙雄同知此外唯沈夏有出身以工侍兼臨安既不
可差乃趣召李衡為侍御史云試院無言事官則不肅

鎖院纔旬日趙雄丁母憂亦不復補差淳熙戊戌春予
為翰林學士上已點定而趙溫叔為相密奏云殿試臨
軒當用天子私人主文今省試是禮部事乃就下差權
禮部尚書范成大雖一時各有意其實三人不知舉之
識先定矣

劉禹錫淮陰行

簇簇淮陰市竹樓緣岸上好日起檣竿鳥飛驚五兩今
日轉船頭金烏指西北煙波與春草千里同一色船頭

大銅環摩挲光陣陣早晚使風來沙頭一眼認何物令
儂羨羨卽船尾燕銜泥趁檣竿宿食長相見隔浦望行
船頭昂尾憶憶無奈脫菜時清淮春浪軟黃魯直云淮
陰行情詞殊嚴語氣尤穩切白樂天元微之爲之皆不
入此律也唯無奈脫菜時不可解當待博物洽聞者說
也予嘗見古本作挑菜時東坡惠州新年詩云水生挑
菜渚恐用此字

唐酒價

昔人應急謂唐之酒價每斗三百引杜詩速宜相就飲
一斗恰有三百青銅錢為證然白樂天為河南尹自勸
絕句云憶昔羈貧應舉年脫衣典酒曲江邊一千一斗
猶賒飲何況官供不著錢又古詩亦有金樽美酒斗十
千之句大抵詩人一時用事未必實價也

白樂天詩

白樂天集第二十五卷宴散詩云小宴追涼散平橋步
月迴笙歌歸院落燈火下樓臺殘暑蟬催盡新秋雁欲

來將何迎睡興臨卧舉殘盃此詩殊未覩富貴氣象第
二聯偶經晏元獻公拈出乃迥然不同

杜荀鶴事

池陽集載杜牧之守郡時有妾懷妊而出之以嫁州人
杜筠後生子即荀鶴也此事人罕知予過池嘗有詩云
千古風流杜牧之詩材猶及杜筠兒向來稍喜唐風集

荀鶴詩集
名唐風
今悟樊川是父師

光武廟左社

錢塘陳益字仲理進士入官淳熙間嘗為奉使金國屬
官過潯沱光武廟塑像左衽有詩云早知為左衽悔不
聽臧宮意亦可取

康輿之重九詞

慶元丙辰重九風雨中七兄約登高於神岡西臺因記
康輿之作高宗時謔詞云重陽日四面雨垂垂戲馬臺
前泥拍肚龍山路上海平臍渰浸倒東籬 茱萸胖黃
菊濕蘢蘢落帽孟嘉尋箬笠漉巾陶令買蓑衣都道不

如歸為之一笑與之自語人云末句或傳兩箇一身泥
非也

杜詩元日至人日

杜詩云元日至人日未有不陰時蓋此七日之間須有
兩三日陰不必皆晴疑子美紀實耳洪興祖引東方朔
占書謂歲後八日一鷄二犬三豕四羊五牛六馬七人
八穀其日晴則所主物有陰則災天寶之亂人物俱災
故子美云爾信如此說穀乃一歲之本何畧之也

木芙蓉詩

唐人袁劉禹錫嘉話云進士陳標詠黃蜀葵詩云能共
牡丹爭幾許得人憎處只緣多予常語客花多固取輕
於人何憎嫌之有因論木芙蓉全似芍藥但患無兩平
字易牡丹寧欲改此句作得人輕處只緣多衆以為善
且謂移芍藥二字在首句則可矣予以失全句為疑或
云本芍藥一名餘容因綴一絕云花如人面映秋波
拒傲清霜色更和能共餘容爭幾許得人輕處只緣多

白樂天和錢學士白牡丹詩云唐昌玉蘂花攀玩衆所
爭折來比顏色一種如瑤瓊彼因稀見貴此以多為輕
固知輕字為勝

辨人生如寄出處

蘇文忠公詩文少重複者惟人生如寄耳十數處用雖
和陶詩亦及之蓋有感于斯言此句本起魏文帝樂府
厥後高僧傳載王羲之與支道林書祖其語爾朱翌新
仲猗覺寮雜志乃引高僧傳及南齊劉善明似未記魏

樂府子為太和蕭人傑秀才作如寄齋記引文忠公詩
甚詳

報班齊

歐公詩云玉勒爭門隨仗入牙牌當殿報齊班或疑其
不然今朝殿爭門者往往隨仗而入及在廷排立既定
駕將御殿閣門持牙牌刻班齊二字候班齊小黃門接
入上先坐後幄黃門復出揚聲云人齊未行門當頭者
應云人齊上即出方轉照壁衛士即鳴鞭然此乃是駕

出時常日則不同

朱希真出處

朱敦儒字希真洛陽人紹聖諫官劾之孫靖康亂離避
地自江西走二廣紹興二年詔廣西宣諭明橐訪求山
林不仕賢者橐薦希真深達治體有經世之才靜退無
競安于貧賤嘗三召不起特補迪功郎後賜出身歷館
職郎官出為浙東提刑致仕居嘉禾詩詞獨步一世秦
丞相晚用其子某為刪定官欲令希真教秦伯陽作詩

遂落致仕除鴻臚少卿蓋久廢之官也或作詩云少室
山人久掛冠不知何事到長安如今縱挿梅花醉未必
王侯着眼看蓋希真舊嘗為鷓鴣天云我是清都山水
郎天教懶慢帶疎狂曾批給露支風勅累奏留雲借月
章詩萬首酒千觴幾曾着眼看侯王玉樓金闕慵歸去
且挿梅花住洛陽最膾炙人口故以此譏之淳熙間沅
州教授湯岩起刊詩海遺珠所書甚畧而云蜀人武橫
詩也未幾秦丞相薨希真亦遣臺評高宗曰此人朕用

索薦以隱逸命官置在館閣豈有始恬退晚奔競耶其希真老愛其子而畏避竄逐不敢不起識者憐之

唐藩鎮官屬入局

杜子美為劍南叅謀遣悶呈嚴鄭公詩云束縛酬知己
蹉跎効小忠又云曉入朱扉啟昏歸畫角終不成尋別
業未敢息微躬韓退之為武寧節度使推官上張僕射
書云使院故事晨入夜歸非有疾病事故輒不許出抑
而行之必發狂疾乃知唐制藩鎮之屬皆晨入昏歸亦

自少暇如牛僧孺待杜牧固不以常禮也

後見洪邁容齋續筆第一

卷所引
與此同

論詩雅頌

揚子法言曰正考甫常晞尹吉甫矣公子奚斯常晞正考甫矣蓋尹吉甫能作崧高烝民等詩以美宣王故正考甫晞之而作商頌是則揚子以閔宮之頌為奚斯所作矣班孟堅王文考為賦序皆有奚斯頌魯僖之言蓋本諸揚子也學者謂閔宮但曰新廟奕奕奚斯所作而

無作頌之文遂疑揚子為誤以予觀之奚斯既以公命作廟又自陳詩歸美其君故八章之中上自姜嫄后稷下逮魯公魯侯備極稱頌至末章始言作廟之功亦不為過只如崧高詩亦云其詩孔碩其風肆好是吉甫固嘗自稱美矣何獨於奚斯而疑之揚子之言必有所據後見洪邁容齋續筆第一卷亦以為相承之誤非也

顯仁皇后挽詩

湯岐公思退在相位作顯仁皇后挽詩云虞妃從梧野

啟母祔稽山無一閒字益顯仁初以賢妃從徽宗北狩
其後祔徽宗葬會稽之永祐陵虞妃謂徽宗也啟母謂
高宗也用事可謂的切高宗山陵予進挽詩取法焉其
云生平同藝祖謂創業中興之主皆丁亥生也慶壽似
慈寧謂母子皆嘗慶八十也然不若岐公之工

陸務觀說東坡三詩

陸務觀云玉性之謂蘇子瞻作王莽譏介甫云入手功
名事事新又詠董卓云公業平時勸用儒諸公何事起

相圖只言世上無健者豈信車中有布乎益譏介甫黨
爭市易事自相叛也車中有布借呂布以指惠卿姓曾
布名其親切如此又云曾吉甫侍郎藏子瞻和錢穆父
詩真本所謂大筆推君西漢手一言寘我二劉間者其
自注云穆父嘗草某荅詔以歆向見喻故有此句而廣
川董彥遠待制乃譏子瞻不當用高光事過矣

山谷哭宗室公壽詩

與務觀同作劉信叔太尉挽詞予誦魯直哭宗室公壽

詩云昔在熙寧日葭莩接貴游題詩奉先寺橫笛寶津樓天網恢中夏賓筵禁列侯但聞劉子政頭白更清修意深語到可見宗室前肆後拘氣象務觀云韓子蒼常見魯直真跡第三聯改云屬舉左官律不通宗室侯以此為勝而曾吉甫獨取前作

南北聲音

四方聲音不同形於詩歌往往多礙其來久矣如北方以行為形故列子直以太行山為太形又如居姪與以

高俄等音居音古今文士皆作協韻雖釋文亦然禮記何居注云居音姬列子何姬却注云音居其詩文與以呂累之類尤多近世士大夫頗笑閩人作賦協韻云天道如何仰之彌高殊不知蘇子由蜀人也文集第一卷嚴碑長韻磨訛高豪何曹何戈亦相間而用云

記夢

予少年嘗夢至人家其書室為叢竹所蔽殊不開爽堂下皆古柳鴉噪不止夢中作詩云竹多翻障月木老只

卷一百六十七
啼鳥意謂竹本清虛延貯風月今反室塞如此種木不
棲鸞鳳徒能集烏以聒耳似譏其主人也後數年為金
陵教官初入廨舍則廳下及門外古柳叅天鴉鳴竟日
廳傍小書室叢竹蔽虧恍如所夢

皇甫湜詩

劉賁父詩話錄云皇甫湜詩無間韓退之有讀公安詩
譏其倚據真壤間又韓集雖有次韻湜陸渾山火之篇
而湜詩俱不傳予嘗得湜永州祁陽元次山唐亭詩碑

題云侍御史內供奉皇甫湜其詩云次山有文章可惋
只在碎然長于指叙約潔多餘態心語適相應出句多
分外于諸作者間拔戟成一隊中行蘇預雖富劇粹美君
可蓋子昂感遇佳未若君雅裁退之全而神上與千年
對李杜才海翻高下非可槩文於一氣間為物莫與大
先生路不荒豈不仰吾輩石屏立衙前溪口啼素瀨我
思何人知徙倚如有賴

後見洪邁容齋隨筆亦載
此詩謂風格無可采非也

老人十初

朱新中鄧川志載郭功父老人十拗詩謂不記近事記
得遠事不能近視能遠視哭無淚笑有淚夜不睡日睡
不肯坐多好行不肯食軟要食硬兒子不惜惜孫子大
事不問碎事絮少飲酒多飲茶暖不出寒即出丁巳歲
予年七十二目視昏花耳中無時不作風雨聲而實雨
却不聞因補一聯云夜雨稀聞聞耳雨春花微見見空
花是亦兩拗也嘗錄寄朱元晦朱大以為然請予足成
之遂貼兩句云佗日自矜盲宰相今復癡龍聾作富家

記趙夢得事

廣西有趙夢得處于海上東坡謫僂耳時每為致中州
家問坡嘗題其澄邁所居二亭曰清斯曰舞琴仍錄陶
淵明杜子美詩及舊作數十紙與之夢得以綾絹求書
坡荅曰幣帛不為服章而以書字上帝所禁又有帖云
舊藏龍焙請來共嘗蓋飲非其人茶有語閉門獨啜心
有愧真佳句也後趙君子婦將產夢有題開國男來謁
者生子名之曰荆而字夢授紹興末登科豐厚夷雅所

至榜書室曰見坡乾道中以左奉議郎知吉州龍泉縣
予因得盡觀坡之翰墨荆去調欽倅未上而卒夢開國
男者殆謂縣宰耶

文忠集卷一百七十七

欽定四庫全書

文忠集卷一百七十八

二老堂詩話下

宋 周必大 撰

記東坡烏臺詩案

元豐己未東坡坐作詩謗訕追赴御史獄當時所供詩案今已印行所謂烏臺詩話是也靖康丁未歲臺吏隨駕挈真案至維揚張全真參政時為中丞南渡取而藏之後張丞相德遠為全真作墓誌諸子以其半遺德遠

充潤筆其半猶存全真家子嘗借觀皆坡親筆凡有
塗改即押字于下而用臺印蘇子容丞相元豐戊戌歲尹
開封治陳世儒獄言者誣以寬縱請求是秋亦自濠州
攝赴臺獄嘗賦詩十四篇今在集中序云子瞻先已被
繫予書居三院東閣而子瞻在知雜南廡才隔一垣其
詩云遙憐北戶吳興守詬辱通宵不忍聞注謂所劾歌
詩有非所宜言頗間鐫詰之語

辨歐陽公用金帶事

杜工部詩屢及銀章歐陽文忠公詩數言金帶此亦常
事後來士大夫多以不仕為曠達又因前輩偶謂老覺
腰金重慵便枕玉涼為未是富貴小說遂云永叔這條
金帶幾次道著予謂近世邁往凌雲視官職如韁鎖誰
如東坡然送陳睦詩云君亦老嫌金帶重望湖樓詞云
不堪金帶垂腰豈害其為達耶

李石霜月詩

唐李義山霜月絕句青女素娥俱耐冷月中霜裏闌嬋

娟本朝石曼卿云素娥青女元無匹霜月亭亭各自愁
意相反而句皆工

陶杜酒詩

陶淵明詩酒能消百慮杜子美詩一酌散千憂皆得趣
之句也

韓杜自比稷契

子美詩自比稷與契退之詩云事業窺稷契子美未免
儒者大言退之實欲踐之也

蘇頌九日侍宴應制詩

予編校文苑英華如詩中數字異同固不足怪至蘇頌
九日侍宴應制得時字韻詩頌集與英華略同首句嘉
會宜長日而世歲時雜詠作并數登高日第二句高游
順動時雜詠作延齡命賞時第三句曉光雲半沈雜詠
作宸遊天上轉第四句晴色雨餘滋雜詠作秋物雨來
滋第五句降鶴因韶德雜詠作承仙馭第六句吹花入
御詞雜詠作睿詞後一聯云願陪陽數節億萬九秋期

雜詠作微臣復何幸長得奉恩私竊意雜詠乃傳書錄
當時之本其後編集八句皆有改定文苑因從之耳杜
甫云新詩改罷自長吟信乎不厭雕琢也

東坡寒碧軒詩

蘇文忠公詩初若豪邁天成其實關鍵甚密再來杭州
作壽星院寒碧軒詩句句切題而未嘗拘其云清風肅
肅搖窓扉窓前脩竹一尺圍紛紛蒼雪落夏簾冉冉綠
霧沾人衣寒碧各在其中第五句日高山蟬抱葉響頗

似無意而杜詩云抱葉寒蟬靜併葉言之寒碧亦在其
中矣人靜翠羽穿林飛固不待言末句却說破道人絕
粒對寒碧為問鶴骨何緣肥其妙如此

金鎖甲

周紫芝竹坡詩話第一段云杜少陵遊何將軍山林詩
有雨拋金鎖甲苔卧綠沉鎗之句言甲拋於雨為金所
鎖鎗臥於苔為綠所沉有將軍不好武之意余讀薛氏
補遺乃以綠沉為精鐵謂隋文帝賜張大淵以綠沉之

甲是也不知金鎖當是何物後又讀趙德麟侯鯖錄謂
綠沉為竹乃引陸氏龜蒙詩一架三百竿綠沉森杳冥
此尤可笑已上皆紫芝之語予按符堅使熊邈造金銀細
鎧金為綫以縲之蔡琰詩云金甲耀日光至今謂甲之
精細者為鎖子甲言其相銜之密也紫芝工詩而詩話
百篇踈失如此何耶綠沉為精鐵則不待辨矣

荀薺詩用斤賣事

紫芝又云兩京作斤賣五谿無人採此高力士詩也魯

直作食筍詩云尚想高將軍五谿無人採是也張文潛
作薺羹詩乃云論斤上國何曾飽旅食江城日至前嘗
慕藜羹最精好固應加糝愧吾原則是高將軍所作乃
薺詩耳非筍詩也二公同時而用事不同如此不知其
因予按二詩各因薺薺而借用作斤賣之句初非用事
不同紫芝何其拘也

綻葩二字

紫芝末篇又云今日校譙國集適此兩卷皆公在宣城

時詩某為兒時先人以公真藁指示某是時已能成誦今日讀之如見數十年前故人終是而熟但句中時有與昔時所見不同者必是痛遭俗人改易爾如病起一

詩云病來久不上層臺

謂宣城疊嶂雙溪也

窓有蜘蛛徑有苔多

少山茶梅子樹未開齊待主人來此篇最為奇絕今乃改云為報園花莫惆悵故教太守及春來非特意脉不倫然亦是何等語又如桃櫻欲破紅改作綻紅梅粉初墜素改作梅葩殊不知綻葩二字是世間第一等惡字

豈可令入詩來又喜雨晴詩云豐穰未可期疲瘵何日
起乃易疲瘵為瘦饑若當時果用瘦饑二字則此老大
段窘也予謂紫芝論俗子改易張文潛詩是也至引櫻
桃欲破紅謂不應改破作綻梅粉不應改作葩云是惡
字豈可入詩然則紅綻雨肥梅不應見杜子美詩詩正
而葩不應見韓退之進學解天葩無根長在目不應見
歐陽永叔長篇況古今詩人亦多用之豈可如此論詩
耶

論縹緲二字

自唐文士詩詞多用縹眇二字本朝蘇文忠公亦數用之其後蜀中大字本改作縹緲蓋韻書未見眇字爾或改作渺字未知孰是予校正文苑英華姑仍其舊而注此說于下

朱元章無量老人詩句

予家有米元章書長壽庵三字後題兩句人是西方無量佛壽如南極老人星不知古人詩句或元章自作也

程祁陳從古梅花詩

政和中廬陵太守程祁學有淵源尤工詩在郡六年郡人段子冲字謙叔學問過人自號潛叟郡以遺逸八行薦力辭與程唱酬梅花絕句展轉千首識者已難其博邇歲有同年陳從古字希顏裒古今梅花詩八百篇一次韻其自序云在漢晉未之或聞自宋鮑照以下僅得十七人共二十一首唐詩人最盛杜少陵纔二首白樂天四首元微之韓退之柳子厚劉夢得杜牧之各一

首其餘不過一二如李翰林韋蘇州孟東野皮日休諸人則又寂無一篇至本朝方盛行而予日積月累酬和及千篇云

記舒州司空山李太白詩

司空山在舒州太湖縣界初經重報寺過馬玉河至金輪院有僧本淨肉身塔及

原闕

葉蓮花池連理山茶自

塔院乃上山至本淨坐禪巖精巧天成中途斷崖絕壑傍臨萬仞號牛背石宗室善修者言石如劍脊中起側

足覆身而過危險之甚度此步步皆佳上有一寺及李
太白書堂一峰玉立有太白瀑布詩云斷岩如削瓜嵐
光破崖綠天河從中來白雲漲川谷玉案赤文字落落
不可讀攝衣凌青霄松風吹我足予兄子中守舒日得
此於宗室公霞今胡仔漁隱叢話載蔡條西清詩話不
言此山但云太白仙去後人有見其詩畧云斷崖如削
瓜嵐光破崖綠天河從中來白雲漲川谷玉案勅文字
世眼不可讀攝身凌青霄松風吹我足又云舉袖霞條

脫招我飲胡麻既誤以斷岩為斷崖與第二句相重赤
文作勅文落落作世眼攝衣作攝身皆淺近與前句大
相遠當塗太白集本元無此詩因子中錄寄郡守遂刻
於後然皆從蔡條誤本子中爭之不從僅能改勅為赤
而已

辨杜詩閑殷闌韻

世言杜子美詩兩押閑字不避家諱故留夜晏詩臨懼
卜夜閑七言詩曾閔朱旗北斗閑俗傳孫覲杜詩押韻

亦用二字其實非也卞圜杜詩本云留懽上夜闌蓋有
投轄之意卞字似上字閑字似闌字而不知者或改作
夜闌又不在韻卞氏本妙不可言杜斗閑者蓋漢書有
朱旗絳天今杜詩既云曾閑朱旗則是因朱旗絳天斗
色亦赤本是殷字於斤切盛也又於顏切紅色也故音
雖不同而字則一體是時宣祖正諱殷字故改作閑全
無義理今既祧廟不諱所謂曾閑朱旗斗閑又何疑
焉

戲舉詩對

乾道七年秋予為禮部侍郎一時長貳每會食多戲舉
詩對或云薔薇刺刺花奴手刺刺皆以聲人每難對予
云鴻雁行行音杭鳥跡書又云半夏禹餘糧借雨為禹涼
為糧也宜以何對予云長春佛見笑益藥名及花名也
吏部張津子問侍郎因云此雅對耳更有通俗之句如
往年胡銓邦衡多髯初除吏部郎官或以胡銓髯吏部
為戲莫能對者是時姚憲令則以司農少卿兼權戶侍

在坐予謂令則君嘗為浙憲豈復遠使欲借以趣對云
姚憲遠提刑益借姚為遙也坐皆大笑淳熙六年吏部
尚書兼侍講程大昌泰之講筵退入部同官問今日講
何經泰之云尚書或又曰尚書講尚書亦詩句也屬予
對之予曰行者留行者坐中復大笑

紅綾白紵詩

唐薛能詩云莫欺闕落殘牙齒曾喫紅綾餅餽來記新
進士時事也王禹偁賀人及第詩云利市襴衫拋白紵

風流名紙寫紅牋予嘗以二事為一聯云襴衫拋白紵
餅餤喫紅綾似是的對葉夢得石林避暑錄紅綾餅餤
為盧延讓詩

一麾出守

顏延年詩屢薦不入官一麾乃出守後人誤用一麾出
守事以為起于杜牧之自云獨把一麾江海去實用旌
麾之麾未必本之顏詩後人因此二字自誤用顏詩耳

記法慧寺門詩

紹興十年六月一日甲辰左光祿大夫守尚書右僕射
同中書門下平章事兼樞密使監修國史秦檜劄子奏
臣聞德無常師主善為師善無常主協于克一此伊尹
相湯咸有一德之言也臣昨見金國達蘭自講和割地
之議故贊陛下取河南故疆既而烏珠蔑其叔達蘭藍
公佐之歸和議已變故贊陛下定弔民伐罪之計今烏
珠變和議果矣臣請為陛下先至江上諭諸路帥同力
招討陛下相次勞軍如漢高祖以馬上定天下不寧厥

居為社稷宗廟決策於今日臣言如不可行即乞罷免以明孔聖陳力就列不能者止之義臣無任懇切之至有旨依奏右張暉代作暉元任司勳員外郎五月除起居舍人八月除中書舍人當時朝士大夫法慧寺門云商湯為太甲孔聖作周任蓋誤以伊尹告太甲為相湯而論語載孔子引周任之言今直以為孔聖也

辨歐陽公釋奠詩

歐陽文忠公外集有早赴府學釋奠詩蓋任留守推官

陪錢惟演行禮時也諸處本皆如此寫汪達云省題詩
集只云釋奠却注作國子監試題蓋惟演止是使相詩
中不應云行祠漢丞相直俎豆兼三代及首善自西京
語皆有嫌疑專指漢事非惟演也當從省題予答云省
題所印如秋彌之類乃官中試題至於釋奠似太平易
況諸本元有早赴府學二字書坊傳會勦之耳其云昔
齒公卿胄嘗聞絃誦聲豈舉業當用乎所謂漢丞相乃
詩句偶然如唐卿周士之類何必拘泥且漢時釋奠豈

預丞相耶今公外集第二卷書懷感事寄梅聖俞云丞相忽南遷送之伊水頭此惟演落平章事移鄧州時亦呼丞相外集十四卷送河南戶曹楊子聰序云居一歲相國彭城公薦之彭城惟演所封郡是又呼為相國按唐白樂天集第五十八卷論節度使王鏐除平章事云伏以宰相者人臣極位天下具瞻非有清望大功不合輕授鏐非清望又無大功深為不可此是唐使相亦謂之宰相故有繫銜大勅之後者茲乃丞相相國宰相三


者在使相皆可稱呼之明證遠號博洽故著此以示後學

王十李三

紹興二十七年御試進士四百三十六人溫州王十朋
為之首其鄉人吳已正未綴特奏狀元則福州李三英
例賜出身附名正奏之後已正有詩舉頭不忍看王十
回首猶欣見李三

鳩芹詩

蜀人縷鳩為膾配以芹菜或為詩云本欲將芹補那知
弄巧成



文忠集卷一百七十八